

COMUNICATO n. 2358 del 10/08/2023

Traduzione in ladino

Ospedèl Nef de Fiem, Fascia e Cembra. L president Fugatti l se à scontrà coi ombolc de la trei valèdes

Via per l domesdì de en jebia ai 3 de aost, aló dal Auditorium Canal de la Cassa Rurèla de Tieser,

l president de la Provinzia autonoma de Trent Maurizio Fugatti l à scontrà i ombolc de la comunanzes per rejonèr del Nef ospedèl de Fiem, Fascia e Cembra.

"Enceben che la legislatura la é do a jir fora, ne à sapù de utol portèr dant i resultac del lurier fat adum coi teritories, che via per la setemènes passèdes i se à palesà dintornvia la realisazion de n ospedèl nef opura per la restruturazion de chel che l é jà, lascian fora la spersa de Masi – chest l à dit l president -. Nosetres, aldò del PUP, ge lascion la dezijion finèla a la comunanzes del post, che les à ence l doer de lurèr fora l Pian Teritorièl de Comunità (PTC). Aboncont, nos fajon na pruma analisa su la spersa di “Dossi”, ajache chesta la é stata portèda dant da n'aministrazion comunèla desche area da poder durèr. Aboncont la dezijion finèla la ge speta a la comunanza. Do da chest – l à dit amò Fugatti – te curt temp volon tor su doi provedimenc, un per meter en consaputa la firmes del besegn de fèr n nef frabicat sanitèr, con chela de binèr ensema proponetes de projet, e un auter per tor demez vèlch un di despositives de la deliberazion del 2022, con chela che ge vegnia recognosciù l enteres public al ospedèl logà a Masi. A chest propojit se vel fèr na valutazion neva del besegn de fèr su n ospedèl nef respet a la restruturazion“.

A la scontrèda à tout pèrt ence l dirigent general del Departiment infrastructures de la Provinzia, Luciano Martorano, e l dirigent general del Departiment teritorie e trasport, ambient, energia, Roberto Andreatta.

Belimpont Andreatta l é jit ite tel detai di provedimenc che la Jonta provenzièla la vel tor su al più prest. "Aldò de chel che l é stat palesà dai teritories, l é debeseegn fèr na neva deliberazion con chela che vegn tout demez l enteres public per la spersa de i Masi, desche pervedù da la deliberazion nr. 2173 del 2022, e vegn confermà l'intenzion de fèr su n ospedèl nef – l à spiegà Andreatta - . Per chel che vèrda l lech, tegnan semper cont de chel che l é vegnù fora dal confront coi enc locai, vegnarà dat directives al Departiment teritorie, trasport, ambient, energia e cooperazion de meter dantfora, per la valutazions tecnich-ambientèles, na spersa grana anter Ciavaleis e Pardac, e de fèr vèlch verifica en cont de la zona Dossi“.

Dintornvia la localisazion, Andreatta l à ence dit avisa che: "La Jonta, tel respet del Pian Urbanistich Provinzièl, la met dant indicazioni de mascima, col tegnir cont di criteries desche l numer di abitanc, la viabilità, l spostament di turis, l livel de urbanisazion de l'area per sparagnèr la doura de teren – l à spiegà –

e do, ge pervegn a la comunanzes ruèr a troèr ghenao l lech, sessaben aldò de la analyses tecnich-ambientèles portèdes dant da la Provinzia e tras la redazion del Pian Teritorial de Comunità.

Donca, te curt temp l’Agenzia per i apalc e i contrac (Apac) la se festidiarà de meter ju e publichèr na manifestazion de enteres, con ite l chèder di besegnes aldò de chel che l é vegnù fora enscin ades, outa a duc i operadores enteressé, acioche zachei mane ite vèlch proponeta su n pian generèl.

Per chesta costion l president l à metù al luster che la proponetes de projet per l ospedèl nef no les jirà inant enfin a canche no vegnarà dit avisa che che se vel fèr per l davegnir del frabicat e de la spersa del ospedèl veie.

L'intervista al president Fugatti

https://www.youtube.com/watch?v=1_reuPYJNdc&t=2s

I filmac de la scontrèda

<https://www.youtube.com/watch?v=0JkKNx20aU0&t=1s>

I retrac e la intervistes se pel les tor ju da [chest link](#)

Traduzion di Servijes Linguistics e Culturèi del Comun general de Fascia

(cdt)